

四庫全書

史部

欽定四庫全書

史部
元和郡縣志卷十二

詳校官編修_臣曹城

檢討_臣德生覆勘

總校官庶吉士_臣倉聖脉

校對官中書_臣范來宗

謄錄監生_臣宋允辰

欽定四庫全書

元和郡縣志卷十

唐 李吉甫 撰

河南道 五

徐州 彭城上

開元戶四萬九千七百二
元和戶三千八百五十八
鄉九十二
鄉八十九

今為徐泗節度使理所

管徐州宿州泗州濠州
管縣一十六
都管戶三

萬七千二百五十二

本禹貢徐州之域春秋時為宋滕薛小邾偃陽之地六國時屬楚秦并天下為泗水郡楚漢之際楚懷王自盱眙徙都之後項羽遷懷王于郴自立為西楚霸王又都于此漢改泗水郡為沛郡又分沛郡立楚國按楚國即今州理是也宣帝地節元年更為彭城郡尋復為楚國自漢以來或理彭城理下邳晉氏南遷又於淮南僑立徐州安帝始分淮北為北徐州宋永初二年加淮南徐州曰南徐州而改北徐州曰徐州明帝時淮北入魏梁

初甃收太清之後尋復入魏徐州復理彭城仍立彭城
郡高齊及後周不改隋開皇二年于此置總管罷郡其
所領縣並屬徐州十四年廢總管府為彭城郡隋亂陷
賊武德四年討平王世充改置徐州總管府七年改為
都督貞觀十七年罷都督初宋高祖經略中原以彭城
險要置府于此至文帝時王玄謨又上表曰彭城南界
大淮左右清汴城隍峻整襟衛周固自淮以西襄陽以
北經塗三千達于齊岱六州之人三十萬戶常得安全

實由此鎮後魏大將軍尉元上表曰彭城宋之要藩南
師來侵莫不用之以陵諸夏輿地志云郡城由來非攻
所能拔按自隋氏鑿汴以來彭城南控埧橋以扼汴路
故其鎮尤重

州境

東西二百六十九里
南北六百八十九里

八到

西至上都二千八十里
西至東都一千二百二里

南取埧橋路至宣州五百里

東南至泗州五百九十里

西南取蕭縣路至宋州三百十里

西南至濠州三百九十里

西北至兗州三百四十里
東北至沂州三百五十里

貢賦 開元貢 五色土各一斗 上細絹
賦 綿 絹

管縣五

彭城 蕭 豐 沛 滕

彭城縣 望郭下

古大彭氏國也漢為彭城縣屬楚國後漢屬彭城國宋
屬彭城郡隋文帝罷郡為縣屬徐州

定國山在縣東四里後魏武定五年慕容紹宗欲擊梁

貞陽侯蕭明營于此山

泗水在縣東去縣十步

州理城貞觀五年築其外城即古大彭氏國漢高祖定天下以為楚國封弟交為楚王東晉封劉裕為宋公至宋武帝以皇子義康為彭城王並都于此後宋平北將軍徐州刺史薛安都乃舉城歸魏

呂梁故城在縣東五十七里春秋時宋之呂邑至漢以為呂縣城臨泗水高百四十尺周迴十七里此城東二

里有三城一在水南一在水中潭上一在水北並高齊所築立鎮以防陳寇

曹公故城在縣東南六十五里在呂梁東岸或言曹公築此以守呂布西岸有城臨水是布之所固也號曰呂布固

故垞城在縣北二十六里或曰古崇侯國兗州人謂實中城曰垞

戲馬臺在縣東南二里項羽所造戲馬于此宋公九日

登戲馬臺即此

寒山堰在縣東南一十八里梁蕭明伐魏堰清水以灌
彭城

呂梁在縣東南五十七里蓋泗水至呂縣積石為梁故
號呂梁陳將吳明徹以舟師破下邳進屯呂梁堰泗水
以灌徐州周將軍烏丸軌達奚長儒率兵救援軌取車
輪數百連鎖貫之橫斷水路然後募壯士夜決堰至明
陳人始覺潰亂爭歸至連鎖之處生擒明徹

蕭縣

上東北至州六十里

本古之蕭國春秋時宋邑漢蕭縣屬沛郡北齊改為承高縣屬彭城郡隋開皇三年罷郡屬徐州改為龍城縣尋復為蕭縣

丁公山在縣東南二十里丁公追漢高帝處

綏輿山在縣東二十五里宋高祖綏輿里人蓋因里以名山也

智井在縣北二百步左傳楚子伐蕭還無社與司馬言

目于胥井而拯之即此也

豐縣

上東南至州一百七十五里

本漢舊縣屬沛郡戰國屬梁後漢屬沛國晉同宋改屬北濟陰郡北齊改為永昌以縣屬焉隋改屬徐州

豐西澤在縣西十五里漢高祖斬白蛇于此

沛縣

上東南至州一百四十三里

本秦舊縣泗水郡理于此蓋取沛澤為縣名漢興四年改名沛郡領三十七縣理相城以此為小沛魏分立譙

郡又以沛為王國晉不改宋為沛縣改屬徐州隋文帝
罷郡縣屬仍舊

微山上有微子冢去縣六十五里

泗水西北流入東去縣五十步

汜水即豐水也西去縣百五十步

縣理城即秦沛縣城也初陳涉起沛令欲以沛應之乃
令樊噲召高祖沛令後悔閉城拒守高祖書帛射城上
曰諸侯並起屠沛令其誅令則家室完父老乃殺沛令

迎高祖立為沛公十二年高祖破黥布還過沛謂沛父老曰遊子悲故鄉吾雖都關中萬歲後吾魂魄猶思樂沛且朕自沛公以誅暴逆其以沛為朕湯沐邑

故留城在縣東南五十五里高祖令張良自擇齊三萬戶良曰始臣起於下邳與陛下會留乃封良為留侯故沛宮在縣東南一里高祖過沛置酒歌大風即此宮也

泗水亭在縣東一百步高祖微時為亭長於此

滕縣

上南至州二百里

本古滕國漢蕃縣也屬魯國宋屬彭城郡漢末太傅陳蕃子逸為魯相改音皮後魏置蕃郡以縣屬焉北齊郡縣並廢隋于此置滕縣屬徐州按古滕國在縣西南十四里滕城是也

奚公山在縣東南六十六里奚仲初造車于此

公邱故城在縣西南十五里夏侯嬰初為滕令故號滕公按此時高祖未立屬縣故滕為秦縣至武帝改為公

邱縣屬沛國

故薛城在縣東南四十三里薛侯國也孟嘗君時薛中六萬家其中富厚天下無比此田文以抗禦楚魏也

合鄉故城在縣東二十三里即論語所謂互鄉是也

案此

以合鄉為互鄉則前卷亳州之鹿邑故城俗名互鄉城者非即論語所謂互鄉矣王應麟困學紀聞謂鹿邑之外有互鄉城邑人相傳謂互鄉童子見孔子者此處也前代因立互鄉縣云云所據不一附識備攷

宿州 符離上

元和戶八千六百七十六 鄉三十六
案開元戶鄉數傳寫缺

本徐州符離縣也元和四年以其地南臨汴河有埇橋
為舳艫之會運漕所歷防虞是資又以鄆縣北屬徐州
疆界闊遠有詔割符離鄆縣及泗州之虹縣置宿州取
古宿國為名也

州境

案州境里數傳寫缺

八到

西北至上都一千九百里
西北至東都一千四百里

東南至泗州四百二十里

東南至淮百里與濠州分中流為界從界至濠州

一百里

西至宋州三百三十里

北至徐州一百五十里

貢賦案開元貢賦傳寫缺

管縣三

苻離 鄆 虹

苻離縣 上北至州一百五十里

本秦舊縣漢屬沛郡高齊時屬睢南郡隋開皇三年罷

郡以縣屬徐州爾雅曰莞苻離也以地多此草故名

睢水自縣西北流入

故相城在縣西北九十里蓋相土舊都也

靈璧故城在縣東北九十里漢二年漢王入彭城項羽以精兵三萬人晨擊漢軍于靈璧東睢水上大破之睢水為之不流

鄆縣 上北至州二百三十二里

本秦舊縣漢屬沛郡後漢屬沛國有大澤鄉陳涉起兵于此為狐鳴宋于此置譙郡齊以為北譙郡後魏改鄆縣為鄆城縣隋開皇三年去城字屬仁州大業二年屬

徐州八年屬譙州後復隸徐州

淮水西南流入經縣南七十里

渙水西自臨渙縣界流入

渦水東去縣一百里

鄆水北去縣三十里

虹縣 上西至州二百里

本漢舊縣屬沛郡虹漢書作垺字梁武帝于此置貢城
戍後魏復置虹縣周大象中省以地屬晉陵縣隋開皇

十八年改晉陵為夏丘縣武德四年于今縣南百里故虹城重疊置虹縣屬仁州貞觀八年屬泗州十三年移今縣理臨汴河

赤坎故城在縣西南五十九里梁天監八年置赤坎戍潼陂一名萬安湖周迴二十里在縣北五里

垓下聚在縣西南五十四里漢高祖圍項羽于垓下大破之即此地也按漢浹縣屬沛郡

浹音絞

垓下即浹縣之

聚落名也圖經云項羽墓在縣南六里按羽死後高祖

以魯公禮葬羽於穀城在今鄆州東阿縣界言在此俗說之謬也

廣濟渠按開元二十七年河南採訪使齊澣以江淮運漕經淮水波濤有沈溺之憂遂開廣濟渠下流自虹縣至楚州淮陰縣北十八里合於淮踰時畢功後以水流峻急行旅艱阻旋又停廢卻由舊河

泗州

臨淮上

開元戶三萬三百五十
元和戶四千一十五

鄉六十
鄉五十

禹貢徐州之域春秋時屬魯又為徐子之國後為楚所滅秦為泗水郡地漢興改泗水為沛郡武帝分置臨淮郡後漢下邳太守理此自晉迄後魏並為宿豫縣後魏於此置東徐州周宣帝大象二年改為泗州隋大業三年改為下邳武德四年復為泗州開元二十三年自宿遷縣移於今理

州境

東西三百八十五里
南北三百七十九里

八到

西北至上都二千三百二十里
西北至東都一千四百七十里

東南陸行至揚州二百七十三里
東水路至楚州二百二十里

西南至濠州二百一十里
西北至埇橋四百二十里

貢賦

開元貢 麻布 細貨布
賦 絹 布

管縣五

臨淮 宿遷 徐城 漣水 下邳

臨淮縣

緊郭下

本漢徐縣地長安四年分徐城南界兩鄉於沙塾村置
臨淮縣南臨淮水西枕汴河開元二十三年自宿遷移

於今理

宿遷縣

上南至州二百一十里

春秋時宋人遷宿之地至漢為朐猶縣屬臨淮郡晉安
帝立宿豫縣隋開皇三年屬泗州寶應元年以犯代宗
廟諱改為宿遷縣

淮水入縣境南與楚州山陽縣分中流為界

舊州城梁將張惠紹北伐軍所次憑固斯城塹其羅城
引水環之今城在泗水之中

金少曰
卷十
下相故城在縣西北七十里秦故縣也項羽即下相人也應劭曰相水出沛國故曰下相

魯肅廟在縣東南一里肅臨淮人後人為之立廟

徐城縣

中東至州五十里

本徐子國也周穆王時徐君偃好行仁義視物如傷東夷歸之者四十餘國穆王聞徐君威德日遠乘八駿之馬使造父御之發楚師襲其不備大破之殺偃王其子遂北徙彭城原東山之下百姓歸之號曰徐山按山今

在下邳縣界楚漢之際項羽置東陽郡漢誅英布置徐縣屬臨淮郡後漢以臨淮郡合於東海明帝又分東海為下邳國理於此晉太康三年復置徐縣屬臨淮郡梁於此置高平郡及高平縣隋開皇十八年改為徐城縣屬泗州理大徐城大業四年移於今理

淮水西南自虹縣界流入

永泰湖縣南二里周迴三百六十三里其中多魚尤出

朱衣鮒

大徐城在縣北三十里

徐君墓在縣北三十二里季札掛劍處

漣水縣

上西北至州一百六十里

本漢公猶縣之地後漢為徐縣之地晉為宿遷縣之境
宋明帝於此置東海郡又於城北置襄贛縣屬焉後魏
改為海安郡隋開皇三年廢郡以縣屬海州五年改襄
贛為漣水縣因縣界有漣水故名武德四年置漣州縣
屬焉貞觀元年廢漣州縣屬泗州

海水在縣東北一百四里

淮水西南自宿遷縣界流入

沐水俗名漣水西南自海州沐陽縣界流入

碩叢湖在縣北百一十六里與海州朐山縣中分為界

下邳縣

上東南至州一百七十五里

本夏時邳國後屬薛左傳薛之祖奚仲遷於邳是也春秋并於宋戰國時屬楚後屬齊至秦曰下邳縣漢屬東海郡魏志曹公征呂布於下邳生擒布令東中郎將鎮

下邳宋改為下邳縣屬東徐州周改東徐為邳州隋省
邳州以縣屬泗州

嶧陽山在縣西六里

泗水西自彭城縣界流入

淮水自縣西流入去縣六十里

沂水經縣北分為二水一水于城北西南入泗一水經
城東屈曲從縣南亦注泗謂之小沂水水上有橋昔張
子房遇黃石公于圯上即此處也南人謂橋為圯

故郟城在縣東北一百五十里古郟子國城孔子問官於郟子即此地也

縣理城古邳國城也魏武征呂布於下邳決泗水引沂水以灌其城即此處也按下邳城有三重大城周迴十二里半中城周四里呂布所守也魏武擒布於白門即大城之門也小城累塼堅峻周二里許西南又有一小城周三百七十步征虜將軍石崇所築也

石鼈屯晉穆帝升平初荀羨為北部都尉鎮下邳起田

於東陽之石鼈

在縣臨津郡界

公私利之北齊廢帝乾明中尚

書左丞蘇珍之又議修石鼈等屯歲收數十萬石自是

淮南軍防糧儲充足

濠州

鍾離上

開元戶二萬五百五十二
元和戶二萬七百二

鄉四十一
鄉四十二

禹貢揚州之域春秋時為鍾離子之國後為吳楚所爭之地左傳楚子為舟師以略吳疆滅鍾離又史記楚平王時鍾離人與吳邊邑卑梁小童爭桑而二邑交相攻

滅秦并天下屬九江郡漢置鍾離縣復隸九江郡晉立
為鍾離郡梁因之宋明帝失淮北地復立徐州於此後
廢帝改號北徐州梁因之以昌義之為北徐州刺史鎮
鍾離魏中山王元英將軍楊大眼率衆數十萬來寇鍾
離城北阻淮水魏人於州東邵陽洲作浮橋晝夜攻城
分番相代義之善射每彎弓所向莫不應弦而倒一日
戰數十合魏軍死者與城中平會高祖遣曹景宗韋叟
率衆二十萬來救魏軍大敗英與大眼脫身而走因輕

騎追至洛口而還州後入高齊文宣帝改為西楚州隋開皇三年改濠州因水為名大業三年改為鍾離郡南北朝皆為重鎮隋亂陷賊武德五年杜伏威附改為濠州按濠州本屬淮南與壽陽阻淮帶山為淮南之險貞觀元年竇參為相於是據淮割地隸屬徐州及徐州節度使張建封死子愔為本軍所立常挫王師其時朝廷幾失淮南之地蓋參不學無術昧於疆理之制所由致也自貞元以後州西渦口對岸置兩城刺史常帶兩城

使以守其要濠宇中間誤去水元和三年又加水焉

州境

東西二百六十里
南北一百八十一里

八到

北取虹縣路至上都二千三百七十五里
西北至東都一千五百一十里

東南至滁州二百三十里

南至廬州三百三十里

西南至壽州二百二十里

西北至徐州四百五十里

東北至泗州三百二十里

東北至楚州盱眙縣二百二十里從縣至楚州一

百九十里

貢賦

開元貢

賦

官絁

絁

絹

綿

布

管縣三

鍾離 定遠 招義

鍾離縣

上郭下

本漢舊縣屬九江郡至晉屬淮南郡安帝時因東郡燕縣流入鍾離者於此置燕縣至高齊復為鍾離縣

塗山在縣西九十五里

淮水西南自壽州界流入

西濠水出縣西南莫邪山北入淮

東濠水出縣南濠塘山東北入淮

當塗縣故城本塗山氏國在縣西南一百一十七里禹娶於塗山即此也

荆山堰在郡城西一百二十二里梁天監十三年魏降人王足陳計於武帝求堰淮水以灌壽陽

曰荆山為上格浮山為下格潼汜為激溝并灌鉅野澤帝遂發徐陽人率二十戶取五丁以築之令太子右衛率康絢左衛將軍昌義之護作令戰士二十萬人於鍾

離城南起浮山堰北抵巉石至十四年四月堰將合淮
水漂度輒復決潰或言江淮多蛟龍其性惡鐵於是引
東西二冶故鐵器大則釜鬲小則鑊鉏數千萬斤沈於
堰所猶不合緣淮百里內木石皆盡負者肩上皆穿士
卒死者十七八十五年四月堰乃成壽陽城成移頓於
八公山淮水清人之墳墓皆歷歷見於水底或謂絢曰
四瀆者天地所以節宣其氣不宜久塞既而昏霧三日
霧解而堰決殺數萬人其聲若雷聞於三百里水中怪

物隨流而下或人頭魚身龍形馬首殊類詭怪不可勝言

莊周臺在縣西南七里濠水經其前莊子與惠子觀魚之所又曰觀魚臺

定遠縣

上北至州一百里

本漢東城縣地屬九江郡梁武帝天監初置屬定遠郡高齊改為大安郡隋仁壽元年廢郡改定遠縣為臨濠縣屬濠州國朝復為定遠縣

洛水經縣西四十里

陰陵縣故城在縣西北六十五里本漢縣也項羽敗於垓下將麾下八百騎潰圍南走灌嬰追羽至陰陵羽迷失道問田父田父紿曰左左乃陷大澤故漢兵及之

東城縣故城在縣東南五十里羽自陰陵至此尚有二十八騎南走至烏江灌嬰等追羽楊喜斬羽於東城即此地

招義縣

上西至州一百四十里

本漢淮陵縣屬臨淮郡後漢屬下邳郡宋孝武帝自淮
北徙睢陵縣改為池南縣陳為招義縣隋大業元年為
化明縣屬濠州武德七年更名招義

淮水西自鍾離縣界流入

浮山堰在縣西北六十里梁天監十三年與荊山堰同

時修築

蔡州 汝南紫

開元戶五萬一千二百一十 鄉一百七
元和戶一萬二百六十三 案鄉數傳寫缺

今為蔡州節度使理所

管蔡州申州光州
管縣
十二
案都管戶數傳寫

缺

古豫州之域春秋時蔡江黃道柏弦胡蓼沈頓項息房
呂十三國之地七國時屬魏秦兼天下為三川河東南
陽潁川碭泗水薛七郡之地漢立汝南郡領二十七縣
理平與宋元嘉中後魏太武帝率兵圍汝南郡守陳憲
守拒四十餘日魏人積屍與城齊不拔而退宋文帝又
於懸瓠城置司州其後太武帝收河南地獻文帝改司

州為豫州周大象二年改為舒州隋文帝改為豫州移入懸瓠城今理是也仁壽四年改為濠州大業二年改蔡州三年罷州為汝南郡武德四年復置豫州寶應元年以避代宗廟諱復改為蔡州

州境

東西四百一十七里
南北五百一十三里

八到

西北至上都一千四百三十里
西北至東都六百二十里

東南至光州三百二十里

西至唐州二百一十里

南至申州二百五十里

北至潁州三百六十里

東北至陳州三百二十里

貢賦

開元貢賦

龜甲雙鴈鷺四窠雲等綾

綾

綿

管縣十一

汝陽

平輿

吳房

西平

朗山

新息

真陽

上蔡

新蔡

褒信

鄆城

汝陽縣

望郭下

本漢舊縣也屬汝南郡晉屬汝南國宋屬汝陽郡隋開皇三年罷郡縣屬豫州仁壽四年改豫州為濠州以縣

屬焉大業二年又移於今理屬蔡州

汝水經縣西南二里

州理城古懸瓠城也汝水屈曲形若垂瓠故城取名焉
平輿故城漢縣也古沈子國在縣東北六十里

鴻郤陂在縣東十里漢成帝時陂溢為害翟方進為丞
相以為決去陂水其地肥美省隄防之費遂奏罷之王
莽時嘗枯旱郡人追怨方進童謠曰壞陂誰翟子威飯
我豆食羹芋魁反乎覆陂當復誰者云兩黃鵠及建武

中太守鄧晨使許陽為都水掾令復鴻郤陂陽曰昔成
帝夢上天天帝怒曰何故壞我濯龍池於是乃因高下
形勢起塘四百餘里數年乃立今廢

平輿縣

中西至州六十二里

本漢平輿縣地屬汝南郡高齊廢隋大業二年重置十
三年陷王世充置輿州管平輿一縣武德中屬蔡州貞
觀元年廢天授二年重置
汝水在縣南四十二里

葛陂周迴三十里在縣東北四十里費長房投杖成龍處

吳房縣

上東南至州九十里

本漢舊縣屬汝南郡後魏置襄城郡仍立遂寧縣以屬焉隋改為濯陽縣大業二年改為吳房縣

西平縣

上東南至州一百五十里

本漢舊縣屬汝南郡後魏置即春秋時柏國也古韓地之分蘇秦說韓王曰韓有劔戟出於棠谿今此縣西界

有蒙谿邨是也縣又有龍泉水可以淬刀劍自漢至後魏皆為西平縣地隋末廢天授三年復置

朗山縣

上東北至州九十一里

本漢安昌縣地屬汝南郡東漢省後魏太平真君二年於朗陵故城復置隋開皇三年移於今理屬豫州十六年改為朗山縣

朗陵山一名大朗山在縣西北三十里

淮水經縣理南去縣一百二十里

道城古道國也在縣東北二十里

朗陵故城漢縣也在縣西南三十五里晉何曾所封之
邑也

四望故城在縣東南七十里後魏太和十一年豫州刺
史王肅於四望陂南築之以禦梁梁太清二年豫州刺
史羊鴟仁以二魏交逼糧運懸斷乃棄懸瓠歸於義陽
上表曰臣輒率所領縮還舊鎮仍留夏紹等停四望城
防備卽此城也

新息縣

上西北至州二百里

本息侯國為楚所滅漢以為新息縣屬汝南郡周武帝於此置息州領此縣隋大業二年州廢改屬豫州武德四年於此重置息州貞觀元年廢以縣屬豫州

淮水自西流入經縣南去縣五里

汝水自西流入經縣北去縣八十里

王梁渠在縣西北五十里隋仁壽中修築開元中縣令薛務更加疏導兩岸通官陂一十六所利田三千餘頃

珉玉坑在古息城東南五步周迴一百八十步深三尺其玉顏色潔白堪為器物隋朝官採用貞觀中亦令採取其後為淮水所沒開元中淮水東移珉坑重出其玉溫潤倍勝昔時蔡州至今以為厥貢之首

賈君祠在縣北一里名彪字偉節後漢時為新息長時小民多不養子彪言其制所活數千僉曰賈父後為立祠

新息故城在縣西南十里

真陽縣

中北至州一百里

本漢慎陽縣屬汝南郡晉屬汝南國後魏改為真陽縣
高齊改為保城縣隋開皇十六年改置真邱縣大業二
年復為真陽縣因慎水為名也

淮水經縣南去縣八十里

慎水出縣西南二十里

上蔡縣

上南至州七十里

本漢舊縣也古蔡國晉上蔡縣屬汝南國後魏神龜三

年於此置臨蔡縣高齊廢隋文開皇十二年移於今理
為上蔡縣

蔡岡在縣東十里周迴五十里

汝水西去縣十五里

新蔡縣

上西北至州一百五十里

本漢舊縣古呂國也漢屬汝南郡晉屬汝陰郡宋屬新
蔡郡東魏孝靜帝於此置蔡州隋開皇十六年於此置
舒州領廣寧縣仁壽二年改縣為汝北大業二年改為

新蔡縣屬蔡州

汝水經縣南去縣二里

襄信縣

中西北至州一百八十里

本漢鄆縣之地後漢分立襄信縣屬汝南郡晉屬汝陰

郡宋改為襄信縣隋大業二年改襄信縣屬蔡州

淮水經縣南去縣七十五里

汝水經縣東北去縣五十五里

白亭在縣東南四十二里左傳楚白公勝所封之地

鄆城縣

紫東南至州一百八十里

本漢縣七國時魏之下邑史記楚昭陽伐魏取鄆兩漢
以為縣屬潁川郡光武謂賈復曰鄆最大宛次之復曰
臣請擊鄆帝執復手曰執金吾擊鄆吾復何憂謂此城
也宋元嘉二年將軍劉緬說曰鄆城有百年之福若北
朝保之未可敵也遂遣將軍殷祖焚其倉糧高齊於今
縣置臨潁郡隋開皇三年廢五年又於廢郡城中置鄆
城縣屬許州武德四年於此置道州貞觀元年廢以縣

屬豫州

汝水經縣西北去縣七十八里

大澱水上承汝水自襄城至歧額城分流南為汝水北為澱水

小澱水縣西北六十里至縣合為大澱水

邵陵故城在縣東四十五里春秋齊桓公帥諸侯之師盟於召陵即此處也漢置邵陵縣屬汝南郡隋廢入鄆城

征羌故城在縣東南七十五里本秦安陵縣建武十二
年來歙征西羌有功故改名以封之

申州 義陽申

開元戶二萬一千二十
鄉四十二
元和戶六百一十四
鄉二十一

本屬淮南道貞元以後隸蔡州節度使

禹貢荊州之域又古申國也鄭武公娶於申曰武姜在
周為侯伯後為楚所滅秦并天下屬南陽郡魏文帝分
置義陽縣自後省置不常宋元嘉末於此立司州自後

入後魏為郢州入梁為司州周武帝平齊改為申州大業二年改為義州武德四年復置申州

州境

東西二百里
南北一百七十八里

八到

西北至上都一千七百里
西北至東都九百四十二里

南至安州二百六十里

西南至隨州二百三十里

西北至唐州二百六十里

北至蔡州二百八十里

東北至光州二百六十里

貢賦

開元貢
賦葛十疋

綿絹

管縣三

義陽 鍾山 羅山

義陽縣

上郭下

本漢平氏縣義陽鄉之地也魏文帝分平氏立義陽縣
江左省義陽縣地入平春縣晉孝武帝改平春曰平陽
隋開皇三年改平陽為義陽縣屬申州大業二年改屬
義州皇朝復屬申州

淮水西自唐州桐柏縣界流入東北經縣去縣三十七

里

故曹城在縣東三十八里梁將曹景宗將兵侵魏所築
故平靖關城在縣南七十六里舊有此關不知何代創
立按義陽有三關之塞此其一也武陽黃峴二關在安
州應山縣界長老云此關因山為障不營濠隍故名平
靖

鍾山縣

上西至州四十里

本漢郿縣也屬江夏郡宋永初中屬義陽郡高齊於此

置齊安郡後改為萬歲郡隋開皇三年罷郡為齊安縣
仍屬申州四年以近鍾山改齊安為鍾山縣

淮水經縣北四十里

澠水出縣南霸山去縣七十五里山石之間波流寒澠
因以為名

石城在縣西南二十一里石城山上本晉義陽縣所理
羅山縣 上西南至州一百一十里

本漢鄱縣地梁武帝置西汝南郡於此隋開皇三年併

入鍾山十六年於鍾山析置羅山縣屬申州武德四年
置南羅州領羅山一縣八年州廢以縣屬申州

羅山在縣西南九里

淮水經縣北去縣二十里

光州 弋陽中

開元戶二萬九千六百九十五 鄉六十一
元和戶二千九百九十 鄉六十二

本屬淮南道貞元以後隸蔡州節度使

禹貢揚州之域春秋時弦國之地魯僖公五年楚人滅

弦弦子奔黃在秦屬九江郡在漢為西陽屬江夏晉安
帝立光城縣理於此梁末於縣置光州隋大業二年罷
州為弋陽郡武德三年改為光州總管府貞觀元年為
光州都督府太極元年自光山縣移今理

州境

東西四百四十三里
南北二百三十五里

八到

西北至上都一千七百三十里
西北至東都九百二十里

西南至申州二百六十里
西南至太別山三百里

西北至蔡州三百里
東北至壽州四百三十里

貢賦

開元貢賦

葛十疋純絹

生石斛六十斤

管縣五

定城

殷城

固始

光山

仙居

定城縣

上郭下

本漢弋陽縣屬汝南郡自漢至蕭齊常為弋陽城武德三年置弦州領定城一縣貞觀元年省定城屬光州淮水去縣六十七里

黃國故城在縣西十二里春秋時黃國後為楚所滅

殷城縣

中北至州一百二十里

本漢期思縣地屬汝南郡宋僞立苞信縣於此梁以苞信縣屬義州隋開皇四年改苞信縣為殷城縣屬弋陽郡武德三年重置義州以縣屬光州

澮水在縣西五里

定城關在縣南四十里高齊以南迫陳境因置此關隋廢

溫湯在縣南山中其湯綠色

固始縣

上西南至州一百五十五里

本漢封蓼侯之地春秋蓼國楚并之今縣城是也自東
晉以後蓼縣省宋明帝失淮北地乃於此僞立新蔡郡
領固始一縣隋開皇七年改屬義州大業三年廢義州
屬弋陽郡

淮水經縣北八十里

姑陂在縣東南四十八里建安中劉馥為揚州刺史興
築以水溉田

孫叔敖祠在縣西北隅七十五里

光山縣

上北至州三十里

本漢西陽縣地屬江夏郡魏屬弋陽郡宋孝武帝大明初于此立光城縣隋開皇三年廢入樂安縣十八年又置光山縣

光山一名弋山在縣西北八十里

淮水經縣北七十里

水陵故關在縣南一百三十二里齊陳二境齊置此關

以為禁防周因不改隋開皇九年平陳後廢

仙居縣

中東至州一百里

本漢軹縣春秋時弦國楚滅之漢以為縣屬江夏郡至宋分立樂安縣天寶元年改為仙居縣縣西有仙居山因名

谷水在縣北九里

軹縣故城在縣北四十里春秋時弦國之都也

仙堂六陂在縣西南十一里梁武大同元年百姓堰谷

水為六陂以溉稻田

元和郡縣卷十

欽定四庫全書

元和郡縣志卷十一

唐 李吉甫 撰

河南道 六

鄆州 東平大都督府

開元戶三萬三千三百八十九 鄉六十二
案元和戶鄉數傳寫缺

今為淄青節度使理所 管鄆州兗州青州齊州曹
州濮州密州海州沂州萊

州淄州登州 管縣七十三
案都管戶數傳寫缺

禹貢兗州之域春秋時屬宋即魯附庸須句

音切

國太昊

之後風姓左傳曰公伐邾取須句戰國時其地屬魏秦
為薛郡地在漢為東平國屬兗州後漢封皇子蒼是為
憲王宋及後魏並為東平郡周宣帝于此置魯州尋廢
隋分兗州萬安縣置鄆州大業三年罷州為東平郡隋
亂陷賊武德五年討平徐圓朗于今鄆城縣置鄆州為
總管府本理鄆城貞觀八年以下濕移理須昌貞元三
年為都督府

州境

東西一百八十七里
南北二百六十四里

八到

西南至上都一千八百二十里
西南至東都九百六十五里

東南至兗州一百九十里
西至曹州三百三十里

北渡河至博州一百八十里
東北至齊州二百八十里

貢賦

開元貢
賦
絹十五疋
綿絹

管縣九

東平 須昌 陽穀 壽張 盧 東阿

鄆城 鉅野 平陰

東平縣

望郭下

古宿國左傳曰公及宋人盟于宿是也兩漢為無鹽地後齊于此置須昌縣屬東平郡縣理無鹽城隋別置須昌縣屬鄆州改須昌縣為宿城縣貞元三年移于州理改為東平縣

須昌縣

望郭下

本漢舊縣屬東郡故須句國按此前須昌縣在今縣東南三十二里須昌故城是也隋改須昌為宿城縣更立

須昌縣于今理屬鄆州縣在州南四十五里

濟水南自鄆城縣界流入去縣西二里

州理故須句城左傳任宿須句顓臾皆風姓也注曰須句雖列國而削弱不能自通魯私屬若顓臾之比也

無鹽故城在縣東三十六里古宿國也列女傳曰無鹽有醜女名宿瘤齊宣王善之立為夫人即此縣女也

清水石橋在縣西三里隋仁壽元年造石作華巧與趙州石橋相埒長四百五十丈

東平思王宇墓在縣東四十九里漢東平思王宇宣帝子後薨葬于此其冢松柏皆西靡王奢侈生葬所愛幸者守冢者常聞號呼數年後乃不復聞聲

陽穀縣

上東南至州七十五里

本漢須昌縣地隋于此置陽穀縣取東阿縣界陽穀亭為名也屬濟州天寶十三年濟州為河所陷沒以縣屬

鄆州

黃河在縣北十二里

故伏城在縣東南二里蓋伏生所居因名之

壽張縣

緊東北至州四十五里

本漢壽良縣也屬東郡後漢光武以叔父名良改曰壽
張屬東平郡隋開皇三年罷郡屬濟州十六年割屬鄆
州武德四年屬壽州五年廢壽州屬鄆州

梁山在縣南三十五里漢書曰孝王北獵梁山是也
壽州故城在縣東南十五里隋末百姓築以為堡武德
四年于此置壽州

呂母垞在縣東南三十五里後漢東海呂母合衆于此
兗州人謂城實中曰垞

廬縣

聚東南至州一百里

本漢舊縣也屬泰山郡都尉理之濟北王所都後漢廬
縣屬濟北國宋屬濟北郡隋開皇三年罷郡縣屬濟州
大業三年復為濟北郡武德四年討平王世充復為濟
州按濟州理碣磈城

碣磈音教
反

本秦東郡之茌平縣也

其城西臨黃河晉末為河水所毀移理河北博州界事

具博州宋元嘉二十年寧朔將軍王玄謨前鋒入河平
礪礪立戍守之都督劉義恭以沙城不堪守召玄謨毀
城而還後更城之後魏略得河南置鎮守泰常八年于
此置濟州至天寶十三載州為河所陷廢

礪礪津在縣北一里後魏于此置關名濟州關隋末廢
劉公橋架濟水在縣東二十七里宋武帝伐燕過此造
橋故俗呼為劉公橋隋末廢貞觀元年重造長十二丈
闊一丈二尺

東阿縣

縣南至州五十里

本漢舊縣也春秋時齊之柯地左傳曰公會齊侯于柯注曰此柯今濟北東阿齊之柯邑猶祝阿也漢志東阿縣屬東郡都尉理晉屬濟北國隋開皇三年屬濟州天寶十三載濟州廢縣屬鄆州

魚山一名吾山在縣東南二十里瓠子歌曰吾山平兮巨野溢魚怫鬱兮迫冬日即此山也曹子建每登此山有終焉之志及亡葬于山下

穀城山在縣東三十二里黃石公出一編書與張良曰
後十三年孺子見我濟北穀城山下黃石即我矣是其
處也

東阿故城在縣西二十里漢東阿縣城也晉太康後省
魏志程昱謂范令靳允曰曹使君智殆天所授君必固
范戍守東阿則田單之功可立謂此城也水經注曰東
阿大井巨若輪深七八丈每歲取此水煮膠入貢本草
所謂阿膠也

陽穀亭在縣東南四十二里左傳齊桓公會諸侯于陽穀是也

項羽墓在縣東二十七里初羽為魯公羽死後魯猶為楚守漢王示以羽首魯乃降羽死乃以公禮葬于此

鄆城縣

緊東北至州一百里

本漢壽良縣地左傳曰晉人執季文子于荅丘還待于鄆按古鄆城即今縣是也漢魏皆為壽張縣地隋開皇四年改為萬安縣十六年于此置鄆城縣貞觀八年移

鄆州于須昌縣鄆城依舊

黎丘在縣西四十五里春秋時黎侯寓于衛因以為名
黎之臣子諷黎侯歸國作詩曰胡為乎泥中蓋惡其卑
濕也

鉅野縣

望西北至州一百二十里

本漢舊縣也屬山陽郡鉅野澤在縣東五里即魯西狩
獲麟處武德四年于此置麟州以是獲麟之地故以為
名五年廢麟州以縣屬鄆州

獲麟堆在縣東十二里春秋哀公十四年經曰西狩獲麟

大野澤一名鉅野在縣東五里南北三百里東西百餘里爾雅十藪魯有大野西狩獲麟于此澤

蚩尤墓在縣東北九里今山陽鉅野縣有蚩尤肩髀冢按黃帝殺蚩尤于涿鹿之野身體異處故別葬焉

平陰縣 上西南至州一百二十里

本漢肥城縣地屬泰山郡古肥子國隋開皇十四年于

今縣西北二十八里置榆山縣大業二年移于今理仍改名平陰屬濟州天寶十三載州廢縣割隸鄆州陶山在縣東三十五里范蠡葬處

黃河去縣十里

平陰故城在縣東北三十五里左傳曰晉侯伐齊齊侯禦諸平陰

故長城首起縣北二十九里齊湣王所築蘇代謂燕王曰齊有長城巨防足以為塞是也

左丘明墓在縣東南五十五里

兗州 魯郡中都督府

開元戶六萬七千三百九十七 鄉一百三十三
業元和戶鄉數傳寫缺

禹貢兗州之域兼得徐州之地春秋時為魯國按武王
即位封周公于少昊之墟曲阜之地周公不就封留佐
武王武王崩又相成王其子伯禽乃就封之魯自伯禽
至頃公三十四君為楚考烈王所滅六國時地屬楚秦
滅楚以魯為薛郡漢高后時更為魯國後漢仍為魯國

兗州所理不恒獻帝初平三年移兗州理濟陰之鄆城
以魏太祖曹操為兗州牧魏仍移兗州理東郡之廩丘
晉不改永嘉之後陷于石勒北州流人南渡成帝立南
兗州寄理京口宋武帝平河南又得其地置兗州後又
屬魏宋文帝元嘉八年理廣陵二十八年理盱眙三十
年復理廣陵隋大業元年于兗州置都督府二年改為
魯州三年改為魯郡十三年為賊徐圓朗所據武德五
年討平圓朗改魯郡置兗州貞觀十四年改置都督府

謹按禹貢導沅水東流為濟截河南渡東與荷澤汶水
會又東北入于海兗州在濟河之間因濟水發源為名
今郡理乃非其境至周置兗州始兼得今郡之地而濟
水自王莽末入河同流于海則河南之地無濟水矣自
後所說皆習舊名

州境

東西二百三十一里
南北三百五十三里

八到

西南至上都一千八百九十五里
西南至東都九百八十里

東至沂州三百八十里
東南至徐州四百里

西南至宋州四百里
西至曹州三百七十里

西北至鄆州一百九十里
正北微東至齊州三百三十里

貢賦

開元貢賦

綾花綾絹

防風

紫石英

管縣十一

瑕丘 金鄉 魚臺 鄒 龔丘 乾封

萊蕪 曲阜 泗水 任城 中都

瑕丘縣 上郭下

本漢縣屬山陽郡即魯之負瑕邑也左傳曰季康子伐

邾以邾子益來囚諸負瑕宋元嘉十三年立兗州理瑕丘城而瑕丘無縣至隋文帝割鄒縣汶陽平原三縣界立瑕丘縣屬兗州

洙水東去縣二十三里

泗水東自曲阜縣界流入與洙水合

淮安王神通營在瑕丘故城中武德五年平賊徐圓朗屯兵之處也

又有管國公任瓌薛國公長孫順德原國公史萬寶壘

列營相次各周迴五里

堯祠在縣南七里洙水之西

金鄉縣

望東北至州一百八十里

本漢東緡縣也屬山陽郡即古之緡國城左傳曰夏桀為仍之會有緡叛之陳留風俗傳曰東緡縣者故陽武戶牖鄉也漢丞相陳平即此鄉人也後漢于今兗州任城縣西南七十五里置金鄉縣蓋因穿山得金故曰金鄉屬山陽武德四年于此置金州五年廢為戴州貞觀

中廢戴州縣屬兗州

昌邑故城在縣西北四十二里其中城周十餘里外城周三十餘里中有鐵柱出地數尺漢景帝三年吳楚趙膠西濟南菑川膠東七國俱反天子命條侯周亞夫將三十六軍擊吳楚亞夫至淮陽問父客鄧都尉策安出客曰莫若引兵東北壁昌邑以梁委吳將軍深溝高壘使輕兵絕淮泗口塞吳饒道吳梁相弊乃以全制其極破吳必矣條侯從之吳楚以正月起三月皆破滅即此

城也

魚臺縣

上東北至州一百九十里

本漢方與縣屬山陽郡高齊文宣帝廢隋開皇十六年
復置方與縣屬戴州貞觀十七年廢戴州縣屬兗州寶
應元年改為魚臺縣因縣北有魯君觀魚臺故名
縣理城即漢方與城也

荷水即濟水也一名五丈溝西自金鄉縣界流入去縣
十里又東南流合泗水泗水東北自任城縣界流入經

縣東與河水合又東流入徐州沛縣界

觀魚臺即武唐亭也在縣北十三里春秋隱公五年公
矢魚于棠是也

太山府君祠在縣西十二里

鄒縣

上

本漢鄒縣地故邾國魯之附庸魯繆公改邾為鄒因鄒
山以為名隋大業二年改兗州為魯州三年罷魯州為
魯郡縣皆屬焉武德五年罷縣屬兗州按邾國之地陸

終之子曹姓所封即今鄒縣是也今黃州亦為邾國之地陸終之後所封蓋終有六子各為國也

嶧山一名鄒山在縣南二十二里禹貢曰嶧陽孤桐即此也秦始皇二十六年觀禮于魯刻石于嶧山晉建武初兗州寄理山上洛陽傾覆鄒鑒獲歸州鄉人士並宗附之遂共推鑒為主與千餘家避難于嶧山中宗假鑒龍驤將軍兗州刺史鎮鄒山後為石勒所侵逼鑒率文武自嶧山奔下邳

鳧山在縣東南三十八里詩曰保有鳧繹遂荒徐宅即此山也

龔丘縣

中南至州五十里

本漢寧陽縣之地屬泰山郡後漢改屬東平國高齊文宣帝移置平原縣于漢寧陽縣城北十七里今縣理也隋以此縣與德州平原縣同名以縣東南二十里有龔丘城遂改為龔丘縣屬兗州

青石山在縣西三十里後魏有青石山祠即謂此也其

山都是一大石耳發地傑立高四十餘丈周迴三里上有石池二所東西行列有類人工冬夏澄清初無耗溢祈雨輒應故古今祀之

故汶陽城在縣東北五十四里其城側土田沃壤故魯號汶陽之田成公二年齊歸我汶陽之田即此

乾封縣

上西南至州一百六十里

本齊之博邑延陵季子適齊子死葬于贏博之間至漢武帝封禪分贏博二縣立奉高縣以奉泰山之祀後魏

改博縣為博平隋開皇十七年改博平為博城縣乾封
元年高宗封岳析長安以置乾封長安元年廢乃于岱
山下改博城縣為乾封縣屬兗州

泰山一曰岱宗在縣西北三十里

社首山在縣西北二十六里

高理山亦曰蒿里山在縣西北二十五里

徂來山亦曰尤來山詩曰徂來之松後漢赤眉渠帥樊
崇保守此山自號尤來山老

汶水源出縣東北原山西南流經縣理南去縣三里又有北汶羸汶柴汶牟汶浯汶述征記曰泰山郡水皆名汶按今縣界凡有五汶皆源別而流同也

岳廟在縣西北三十里泰山之南郡國志廟前有柏樹漢武帝所種赤眉賊斫一樹見血乃止有嶽令掌之開元十三年冬玄宗登封泰山登封之夕凝氛昏晦迅風激烈皇帝出齋宮露立以請及明清霽旗旛不搖事畢至山下日又抱戴明曜五色千官稱賀其日大赦以靈

岳昭感封泰山神為天齊王

萊蕪縣

中西南至州二百六十里

本漢縣也故城在今淄州東南六十里齊靈公滅萊萊
人流播邑落荒蕪故曰萊蕪後漢范史雲曾為此縣長
百姓歌其清儉曰甌中生塵范史雲釜中生魚范萊蕪
至晉廢後魏移古羸縣于此貞觀元年廢入博城縣至
長安四年又于廢羸縣置萊蕪縣取漢舊名也屬兗州
韶山在縣西北二十里其山出鐵漢置鐵官至今鼓鑄

不絕

曲阜縣

上西北至州四十五里

本漢魯縣即春秋時魯國伯禽所都其地即古炎帝之墟也自後或為魯國或為魯郡而縣屬焉高齊文宣帝省魯郡仍于魯城置任城郡隋開皇三年罷郡仍移汶陽縣理此屬兗州十六年改汶陽縣為曲阜縣

防山在縣東二十五里禮記曰孔子既得合葬于防即此是也

壽丘在縣東北六里皇甫謐以為黃帝生于壽丘在魯城東門之北

曲阜在縣理魯城中委曲長七八里今按季子臺及大庭氏庫及縣理城並在其上

洙泗二水東自泗水縣界流入又西南流經縣北分為二流水側有一城為二水之分會也南為泗水北為洙水二水之間即夫子領徒之所居也

沂水亦名雩水源出縣東南八里垆澤俗名連泉澤在

縣東南九里魯僖公牧馬之地詩曰駟駒牡馬在坰之野是也

闕里在縣西南三里魯城中北去洙水百餘步

兩觀在縣東南五十步定公二年雉門及兩觀災即家語孔子戮少正卯之處

矍相圃在縣西三里魯城中

孔子墓在縣西北三里魯城之北

靈光殿魯王所造在魯城內按文選漢景帝子名餘封

為魯王好理宮室而建此殿遭王莽亂宮室被焚建章
皆隳壞而靈光殿歸然獨存

泗水縣

上西南至州一百里

本漢卞縣之地即春秋之靈祊地隋分汶陽縣于此城
置泗水縣屬兗州

尼丘山在縣南五十里叔梁紇禱尼丘山而生孔子

梁父山在縣北八十里西接徂來山封禪書曰古者封

泰山禪梁父七十二家

龜山在縣東北七十五里詩曰奄有龜蒙定公十一年左傳曰齊人來歸龜陰之田是也

泗水源出縣東陪尾山其源有四四泉俱導因以為名盜泉源出縣東北高裡山之陰淮南子曰孔子不飲盜泉之水

漏澤在縣東七十里此澤漏穴有五皆方丈餘深二丈以上其澤每夏積水秋冬漏竭將漏之時居人知之不過三日漏水都盡先以竹木作薄籬圍之水族山積也

菟裘故城在縣北五十五里魯隱公曰使營菟裘吾將老焉

任城縣

緊東至州七十六里

本漢舊縣屬東平國古任國太昊之後風姓也僖二十一年左傳曰任宿須句皆風姓也注曰任今任城縣也魏志曰文帝封鄆陵侯彰為任城王齊天保七年移高平郡于此任城縣屬焉隋開皇三年罷高平郡屬兗州承注山在縣東南七十六里云女媧生處按今山下有

女媧廟

桓公溝源出縣理西四十里萌山之下宋武北征記曰
桓公宣武以太和四年率衆平趙魏時遣冠軍將軍毛
彪生鑿此溝號曰桓公溝于今四十九年矣溝已填塞
公遣寧朔將軍朱超更鑿石通之

女媧陵在縣東南三十九里

魏王粲墓在縣南五十二里

中都縣上西北至州一百里

本魯國邑也定公以孔子為中都宰一年四方皆則之
禮記曰夫子制于中都四寸之棺五寸之槨由中都宰
為司寇故城在今縣西三十九里一名殷密城至漢以
其地為東平陸縣屬東平國齊高帝改平陸縣為樂平
縣隋復改樂平為平陸縣屬兗州天寶元年改為中都
割屬鄆州今卻隸兗州

汶水北去縣二十四里又北入西昌縣界

桓水在縣西八十里晉桓溫進軍北次金鄉鑿鉅野三

百里以通舟運自清水入河以是桓所鑿故曰桓水亦

曰桓河

青州 北海望

開元戶五萬五千一百三十二 鄉一百二
案元和戶鄉數傳寫缺

古少昊氏之墟禹貢青州之地舜時以青州越海遼遠
分為營州禹復置九州武王克商封師尚父于齊營丘
周成王少時命太公曰東至于海西至于河南至于穆
陵北至于無棣

穆陵山在今聊郡沂水縣界無棣今景城郡屬縣也

五侯九伯實

得征之至二十九代為田和所篡和子孫強盛與燕趙
韓魏楚俱稱王五世至建為秦所滅分齊地置齊瑯琊
二郡漢元年更為臨淄項羽立田都為王都臨淄其年
四月田榮擊都走楚榮自立為王十二月楚擊榮榮走
平原項羽立田假為王榮弟橫擊假假走楚楚立田廣
為王三年韓信殺廣漢立韓信為齊王五年信徙王楚
六年以膠東等七十餘城封皇子肥為齊王傳國至厲
王昌國除武帝復封次子閔為齊王後國除遂以齊為

郡領縣十二理臨淄後漢改齊郡為齊國曹魏明帝封
子芳為齊王尋即帝位晉武帝以弟攸為王子冏嗣永
嘉末陷于石勒其後南燕慕容德建都于此至慕容超
宋武帝伐克之以沈文秀為青州刺史守東陽城為魏
將慕容白曜所陷遂入後魏隋大業三年罷州為北海
郡領縣十隋亂陷賊武德二年海岱平定改為青州置
總管府

州境

東西二百七十里
南北三百四十四里

八卦

西南至上都二千四百五里
西南至東都一千五百五十里

東至密州三百三十里
南至沂州四百五十里

西北至棣州三百二十三里
東北至萊州三百四十五里

貢賦

開元貢賦

仙史綾
綿絹

棗糖

海物

管縣七

益都 臨淄 千乘 臨朐 北海 寿光

博昌

益都縣

望郭下

本漢廣固縣之地魏于今壽光縣南十里益都城置益都縣屬齊國宋及後魏屬齊郡隋開皇三年罷郡縣屬青州

淄水西去縣五十五里

廣固城在縣西四里晉永嘉五年東萊牟平人曹嶷為刺史所築有大澗甚廣固故謂之廣固初南燕慕容德議所都尚書潘聰曰青齊沃壤號東秦土方二千里四塞之固負海之饒可謂用武之國廣固者曹嶷之所營

山川阻峻足為帝王之都德從之及義熙五年宋武征慕容超于廣固也城側有五龍口險阻難攻兵力疲弊河間人玄文說裕曰昔趙攻曹嶷望風者以為澠水帶城非可攻拔若塞五龍口城當必陷石季龍從之嶷請降後五日大雨震雷復開從舟嶧陽冉閔之亂段龕據之慕容恪攻圍數月不克又塞五龍口龕遂降後無幾又震開之今舊基猶存宜試修塞裕從之超及城中男女皆患腳弱病者大半超遂出奔為晉所擒

臨淄縣

緊南至州四十里

古營丘之地呂望所封齊之都也太公後二十九代康公為田和所滅和立為齊侯後稱王五代至王建為秦所滅秦立為縣城臨淄水故曰臨淄自漢至後魏並屬齊郡高齊省隋開皇十六年移高陽縣理此改為臨淄縣以屬青州焉

社山在縣西北二十五里一名愚公山有愚公谷在山之陰

牛山在縣南二十五里昔齊景公遊牛山北望而歎曰
美哉國乎古而無死將何去此晏子對曰古而無死則
太公丁公之樂也君何預于此哉

營丘在縣北百步外城中爾雅曰水出其前經其左曰
營丘今臨淄城中有丘淄水出其前經其左故曰營丘
葵丘在縣西北二十里桓公會諸侯于此

縣理即古臨淄城也漢齊郡亦理于此蘇秦說齊王曰
臨淄城中七萬戶戶不下三人即二十一萬人又燕王

謂蘇代曰吾聞齊地清濟濁河可以為固長城巨防可
以為塞漢書田肯曰夫齊東有瑯琊即墨之饒南有泰
山之固懸隔千里持戟百萬齊得十二焉此東秦也非
子弟勿王漢六年封皇子肥為齊王盡得故齊地人能
齊言者悉與之

齊雪宮故址在縣東北六里晏子春秋所謂齊侯見晏
子于雪宮也

天齊池在縣東南十五里封禪書曰齊之所以為齊者

以天齊池也

齊桓公墓在縣東南二十三里鼎足山上貞觀十一年
詔致祭禁二十步內不令樵蘇

管仲墓在縣南二十三里

晏嬰墓在縣東北三里貞觀十一年詔十五步並禁樵
蘇

千乘縣

上東南至州八十里

本漢舊縣也屬千乘郡有鹽官後漢和帝永元七年改

千乘國為樂安郡千乘縣仍屬焉武德二年于此置乘
州八年廢乘州千乘依舊屬青州千乘者以齊景公有
馬千駟畋于青丘今縣北有青丘縣因以為名

淄水南去縣二十八里

臨朐縣

上北至州四十里

本漢縣也屬齊郡縣東有朐山因以為名隋開皇六年
改為逢山縣屬青州取縣西逢山為名大業二年又改
為臨朐縣

胸山在縣東南二里

逢山在縣西二十二里

破車峴在縣東南三十五里按峴高七十丈周迴二十里道徑險惡因名破車峴

北海縣緊西北至州一百三十里

本漢平壽縣也屬北海郡隋開皇三年罷郡置下密縣于廢郡中屬青州十六年又于此置濰州取界內濰水為名大業二年廢濰州仍改下密縣為北海縣

海水在縣東北一百二十里禹貢曰海岱惟青州今按海東接萊州西接壽光縣界

濰水南去縣五十五里

膠水東去縣八十五里與萊州膠水縣中分為界

公孫弘墓在縣西

壽光縣

緊西南至州七十里

本漢舊縣也屬北海郡後漢改屬樂安郡宋省壽光縣隋開皇六年于縣北一里博昌故城置壽光縣屬青州

武德二年屬乘州八年廢乘州還屬青州

海水在縣東北一百十里東接北海縣界西接博昌縣界

淄澠二水西自千乘縣界流入去縣四十里

博昌縣

上東南至州一百二十里

本漢舊縣屬千乘郡昌水其勢平博故曰博昌後漢以千乘郡為樂安郡博昌縣仍屬焉晉宋後魏並同高齊省移樂陵縣

今縣東十二里樂陵故城

理此屬樂安郡隋開皇三年

罷郡樂陵縣屬青州十六年改為博昌縣

濟水北去縣百步又東北流入海

海浦在縣東北二百八里即濟水東流入海之處水口
謂之海浦

薄姑故城在縣東北六十里齊舊都也

齊州 齊郡上

開元戶四萬九千一百五十七
案鄉數及元和戶鄉數並傳寫缺

禹貢兗州之域春秋及戰國時屬齊國秦并天下為齊

郡漢分齊郡立濟南國今州即濟南國之歷城縣理也
景帝三年為濟南郡理東平陵屬青州晉永嘉之後郡
移理歷城即今州理是也後為石勒所據慕容氏亦有
其地義熙五年劉裕平之宋元嘉九年分青州立冀州
理歷城後魏將慕容白曜攻下歷城文帝改冀州為齊
州與濟南郡並理隋開皇十三年罷郡以所領縣屬齊
州大業三年罷州為齊郡隋末陷于寇賊武德元年海
岱平定罷郡復州

州境

東西三百八十二里
南北一百四十二里

八到

西南至上都二千一百五里
西南至東都一千二百里

東至潞州一百九十里
西渡河至博州二百九十里

正南微西至兗州三百三十里
正北微西至德州二百四十五里

東北渡河至棣州三百五十里

貢賦

開元貢
絲葛
綿絹

管縣九

歷城 全節 章丘 亭山 臨邑 臨濟

長清 豐齊 禹城

歷城縣

上郭下

古齊歷下城對歷山之下漢為歷城縣屬濟南國晉屬濟南郡隋開皇三年罷郡縣屬齊州

華不注山一名華山在縣東北十五里齊晉戰于鞍齊敗績晉逐之三周華不注

州理城古歷下城也左傳晉平公伐齊戰于歷漢書酈食其說齊王田廣罷歷下軍守備韓信度平原襲破歷

下因入臨淄述征記曰歷城到營城三十里自城以東水瀰漫數十里南則迫山實為險固也

神通寺在縣東七十里琨瑞山中苻秦時沙門竺僧朗隱居也朗少事佛圖澄尤明氣緯隱于此谷因謂之朗公谷

全節縣

上西南至州七十里

本春秋譚國之地齊滅之漢以為東平陵縣屬濟南郡宋省東字後魏為東陵至周省其全節縣本是隋末土

人李滿率鄉人據堡贍以家財武德二年歸國于堡置
譚州及平陵縣以滿為譚州總管貞觀元年廢譚州縣
屬齊州十七年燕亮構逆滿及男君球固守賊平縣廢
有詔重置縣改名全節以旌其功焉

濟水在縣北四十里

巨合城在縣東南二十三里耿弇討張步守巨里即此
城也

章丘縣 上

本漢陽丘縣也屬濟南郡高齊文宣帝天保七年自高唐故城移高唐縣理于此隋開皇十八年以博州亦有高唐縣改為章丘縣屬齊州取縣南章丘山為名也武德二年屬譚州貞觀元年廢譚州又屬齊州

東陵山在縣南二十八里莊子曰盜跖死于東陵之上龍盤山在縣東二十五里上有神迹是姜嫄所履處

長白山在縣東南三十里高二千九百丈周迴六十里齊記曰於陵城西三里有長白山即陳仲子夫妻所隱

也

濟水西去縣十七里

縣理城即黃巾城也在濟水之南岸漢獻帝建安中黃巾賊張角之所守也

亭山縣

上西北至州九十里

本漢平陵縣地宋于此置衛國縣屬頓丘郡隋開皇六年改為亭山縣屬齊州縣東南有亭山因以為名

長白山在縣東北六十里

百脈水出縣東北平地水源方百餘步百泉俱出合流故名之

臨邑縣

上南至州六十里

本漢舊縣屬東郡至晉屬濟北國宋孝武帝孝建二年立東魏郡理臺城以臨邑縣屬焉隋開皇三年罷郡臨邑縣屬齊州武德二年屬譚州貞觀元年廢譚州屬齊州

黃河在縣北七十里

金定八日
卷十一
濟水西去縣四十里

潔水北去縣七里

鹿角關在縣西北七十里隋大業三年廢

臨濟縣

上西南至州一百二十里

本漢管縣屬濟南郡隋開皇六年移朝陽縣理于此屬
濟州十六年改為臨濟縣

黃河在縣北八十里

濟水在縣南二十里

長清縣

上東北至州八十里

本漢盧縣地隋開皇五年于此置鎮十四年廢鎮置長清縣屬濟州因清水為名貞觀十七年廢濟州屬齊州隔馬山在縣東南三十五里左傳曰晉侯伐齊齊師遁夙沙衛斬馬于隘以塞道後因為隔馬山

黃河北去縣五十五里

濟水北去縣十里

清水西南去縣十里

清溝泊在縣西南五里東西三十里南北二十五里水族生焉數州取給

廢四口關在縣西南五十里後魏置武德九年廢

石窰故城在縣東三十里

豐齊縣

上東北至州四十里

本漢茌縣也取縣東北茌山為名屬泰山郡隋大業二年省入歷城縣武德元年重置天寶元年改為豐齊
岐陽山在縣東南五十里

濟水西去縣二十六里

祝阿故城在縣東北二里禮記曰武王克殷封黃帝之後于祝即此

禹城縣

上東南至州一百五十里

本漢祝阿縣春秋時齊邑漢以為縣屬平原郡隋開皇十六年改屬濟州天寶元年改名禹城縣以縣西南三十里有禹息故城因名在州西北八十五里

元和郡縣志卷十一